



Cuira, ils 19 da fanadur 2022

Communicaziun a las medias

Codes QR rumantschs – «sbrinzlas» rumantschas en tut il idioms

Emprender in pèr plets rumantschs a moda nuncumplitgada è in giavisch derasà. Per facilitar quai ha la Lia Rumantscha lantschà il project codes QR rumantschs. En il rom da quel stampan actualmain diesch fatschentas grischunas in code QR sin lur products. Vegn il code scannà, s'avra ina pagina cun noziuns, «sbrinzlas», rumantschas. L'idea davostiers: dar in access simpel ad in pèr plets rumantschs.

Pudair empustar insatge en l'ustaria, cumprar in pèr liongias engiadinaisas ni cosmetica natirala – e quai per rumantsch è in giavisch da blera glieud cun interess per nossa lingua. Quest giavisch vegn uss accumulì: dapi dacurt datti numnadain in tut las regiuns rumantschas in pèr «sbrinzlas» inizialas per rumantsch. Quai grazia a codes QR sin products indigens, in project che la Lia Rumantscha ha lantschà ensemen cun pliras fatschentas grischunas da differentas branschas.

Il diever da quests codes QR è simpel: mintga code sin ils products indigens po vegnir scannà cun l'app da fotografar dal telefonin e represchenta ina clav digitala che avra ina sutpagina sin www.curs.ch da da la Lia Rumantscha. Là sa chattan plets, emprimas frisas simplas rumantschas ed in vocabulari da basa en l'idiom da la regiun d'origin dal product. Questas «sbrinzlas» pon ins tadlar, exercitar e repeter fin ch'ins piglia fiu per il rumantsch.

Plivalur per fatschentas e clientella

Per las fatschentas èn ils codes QR ina via per communitgar lur cultura e lur ragischs rumantschas. Igl è in'entrada en il mund rumantsch che duai far gust sin dapli. Tgi che cumpra ils products, po emprender d'enconuscher a moda nuncumplitgada la lingua e la cultura rumantscha.

Il project da pilot codes QR rumantschs era vegnì realisà l'onn 2020 ensemen cun emprimas fatschentas partenarias da l'Engiadina Bassa. Suentar las emprimas experientschas positivas ha la Lia Rumantscha schlargià la puschida l'entschatta da questa stad. Uschia sa participeschan actualmain diesch fatschentas or da tut las regiuns rumantschas. La finamira è da cumpletter la spierta cuntinadamain. Durant la stad purtretescha la Lia Rumantscha las fatschentas participadas sin ses channels da las medias socialas. Tgi che vul già ussa dar in'egliada a las «sbrinzlas» rumantschas, po far quai sin www.liarumantscha.ch.